

**“ДАРХЛААЖУУЛАЛТЫН ТУХАЙ ХУУЛЬД НЭМЭЛТ ОРУУЛАХ ТУХАЙ” ХУУЛИЙН
ТӨСЛИЙН ҮР НӨЛӨӨГ ҮНЭЛСЭН АЖЛЫН ТАЙЛАН**

2023 он

АГУУЛГА

1. Нийтлэг зүйл
2. Хуулийн төслийн үр нөлөөг үнэлэх шалгуур үзүүлэлт
3. Хуулийн төслөөс үр нөлөөг үнэлэх хэсэг
4. Урьдчилан сонгосон шалгуур үзүүлэлтэд тохирох шалгах хэрэгслийн дагуу үнэлсэн хуулийн төслийн үр нөлөөний үнэлгээ
5. Үр дүн, зөвлөмж

Нэг.Нийтлэг зүйл

Дархлаажуулалтын тухай хуульд нэмэлт оруулах тухай хуулийн төсөлд шалгуур үзүүлэлтийн дагуу дүн шинжилгээ хийн, түүний үр нөлөөг тооцож, хуулийн төслийг боловсронгуй болгоход энэхүү үнэлгээний ажлын зорилго оршино.

Дархлаажуулалтын тухай хуульд нэмэлт оруулах тухай хуулийн төслийн үр нөлөөг үнэлэх ажиллагааг Засгийн газрын 2016 оны 59 дүгээр тогтоолын 3 дугаар хавсралтаар батлагдсан “Хууль тогтоомжийн төслийн үр нөлөөг үнэлэх аргачлал”-д заасны дагуу дараах үе шаттайгаар хийлээ. Үүнд:

1. Шалгуур үзүүлэлтийг сонгох;
2. Хуулийн төслөөс үр нөлөө тооцох хэсгээ тогтоох;
3. Урьдчилан сонгосон шалгуур үзүүлэлтэд тохирох шалгах, хэрэгслийн дагуу үр нөлөөг тооцох;
4. Үр дүнг үнэлэх, зөвлөмж өгөх гэсэн үе шатыг баримтлан гүйцэтгэлээ.

Хоёр.Хуулийн төслийн үр нөлөөг үнэлэх шалгуур үзүүлэлтийг сонгосон байдал

Дархлаажуулалтын тухай хуулийн 3 дугаар зүйлийн 3.1.2 дахь заалтад "заавал хийх дархлаажуулалт" гэж дархлаажуулах насны бүх хүнийг заавал хамарвал зохих дархлаажуулалтыг, 10 дугаар зүйлийн 10.1 дэх хэсэгт “Заавал хийх дархлаажуулалтад сүрьеэ, халдварт саа /полиомиелит/, В вируст гепатит, сахуу, хөхүүл ханиад, татран, улаанбурхан, В хэв шинжийн хемофилюс инфлюенза нянгийн халдвар, гахай хавдар, улаануудын эсрэг сэргийлэх тарилга орно” гэсэн зохицуулалтыг сонгон авч үр нөлөөг үнэлсэн. Тус үнэлгээний ажлыг хийж гүйцэтгэхдээ хуулийн төслийн зорилго, хамрах хүрээ, зохицуулах асуудалтай уялдуулан, аргачлалд заасан 6 шалгуур үзүүлэлтээс 4 шалгуур үзүүлэлтийг сонголоо. Үүнд:

- Практикт хэрэгжих боломж;
- Хүлээн зөвшөөрөгдөх байдал;
- Зардал;
- Харилцан уялдаа;

Практикт хэрэгжих боломж шалгуур үзүүлэлтийн хүрээнд хуулийн төслийн зохицуулалтыг дагаж мөрдөх буюу хэрэгжүүлэх боломж байгаа эсэхийг шалгана.

Хүлээн зөвшөөрөгдсөн байдал шалгуур үзүүлэлтийн хүрээнд хуулийн төслөөр үүрэг хүлээлгэсэн, шинэ чиг үүрэг нэмсэн зохицуулалтад үүрэг хүлээлгэсэн этгээд хуулийн төслийн зохицуулалтыг хүлээн зөвшөөрөх эсэхийг шалгана.

Зардал шалгуур үзүүлэлтийн хүрээнд хуулийн төслийн зохицуулалт иргэн, аж ахуйн нэгж, байгууллага болон төсөвт ачаалал үүсгэх, төрийн байгууллагад хуулийн төслийг хэрэгжүүлэхтэй холбоотой зардал гарахыг тооцон судлах байдлаар сонгов.

Харилцан уялдаа гэсэн шалгуур үзүүлэлтийг хуулийн төслийн зөрчил, давхардал, хийдлийг судлах зорилгоор сонгов.

Гурав. Хуулийн төслөөс үр нөлөөг үнэлэх хэсгийг тогтоосон байдал

Дархлаажуулалтын тухай хуулийн 10 дугаар зүйлийн 10.1 дэх хэсгийн “В хэв шинжийн хемофилюс инфлюенза нянгийн халдвар” гэсний дараа “А вируст гепатит, пневмококк, хүний папиллома вирусийн халдвар” гэж нэмэлт оруулна.

Дөрөв. Урьдчилан сонгосон шалгуур үзүүлэлтэд тохирох шалгах хэрэгсэлийн дагуу үнэлсэн хуулийн төслийн үр нөлөөний үнэлгээ

Урьдчилан сонгосон шалгуур үзүүлэлтэд тохирсон аргачлалд тодорхойлогдсон дараах шалгах хэрэгслүүд байна.

Д/д	Шалгуур үзүүлэлт	Үр нөлөөг үнэлэх хэсэг	Тохирох шалгах хэрэгсэл
1	Практикт хэрэгжих боломж	Дархлаажуулалтын тухай хуулийн 10 дугаар зүйлийн 10.1 дэх хэсгийн “В хэв шинжийн хемофилюс инфлюенза нянгийн халдвар” гэсний дараа “А вируст гепатит, пневмококк, хүний папиллома вирусийн халдвар” гэж нэмэлт оруулна.	Практикт турших
2	Хүлээн зөвшөөрөгдөх байдал		Хүлээн зөвшөөрөх байдлын судалгаа хийх
3	Зардал		Зардлын тооцоо хийх
4	Харилцан уялдаа		Давхардал хийдлийг судлах

4.1 Практикт хэрэгжих боломж шалгуур үзүүлэлтийн хүрээнд

Дархлаажуулалтын тухай хуулийн 10 дугаар зүйлийн 10.1 дэх хэсгийн “В хэв шинжийн хемофилюс инфлюенза нянгийн халдвар” гэсний дараа “А вируст гепатит, пневмококк, хүний папиллома вирусийн халдвар” гэж хуульд нэмэлтээр орж байгаа зохицуулалт нь олон улсын судалгааны үр дүн болон Эрүүл мэндийн сайдын тушаалаар А вируст гепатитын эсрэг вакциныг 2011 оноос тархвар судлалын заалтаар, пневмококкийн эсрэг вакциныг 2016-2019 онд тус тус үе шаттайгаар нэвтрүүлсэн нь дараах үр дүнгүүд гарсан тул **практикт хэрэгжих боломжтой гэж үнэлэв.**

Вакцин нэвтрүүлж эхэлснээр А вируст гепатитын шинэ тохиолдлын тоо 21.5 дахин буурч, 2021 оны байдлаар улсын хэмжээнд 18 тохиолдол буюу 10 000 хүн ам тутамд 0.1 тохиолдол бүртгэгдсэн нь 2011 онтой харьцуулахад өвчлөл 99 дахин буураад байна.

Пневмококкийн эсрэг вакциныг 2016 оноос эхлэн нийслэлийн дүүргүүдэд, 2017 оноос хүн ам, хүүхдийн өвчлөл эндэгдэл ихтэй зарим аймгууд, 2019 оноос улсын хэмжээнд бүрэн нэвтрүүлсэн. Пневмококкийн эсрэг 13 цэнт вакцины үр дүнг судлах судалгааны үр дүнд пневмококкоор үүсгэгдсэн уушгины хатгалгаа 26 хувь, хүнд хэлбэрийн хатгалгаа 42 хувь, маш хүнд хэлбэрийн уушгины хатгалгаа 46 хувиар тус тус буурсан үр дүнтэй байна.

Хүний папиллома вирусийн эсрэг вакциныг 150 гаруй улс нэвтрүүлснээс дархлаажуулалтын үндэсний хөтөлбөртэй 120 гаруй улс орон нь нэвтрүүлсэн байна.

Америкийн Нэгдсэн Улс, Австрали, Шотланд зэрэг хүний папиллома вирусийн вакцинжуулалтын хөтөлбөртэй 14 гаруй улс орнуудад хийсэн судалгаагаар хүний папиллома вирусийн халдарын эсрэг вакцин нь умайн хүзүүний хорт хавдраас аль хэдийн сэргийлж байгаа нь нотлогджээ. Тухайлбал Швед, Дани улсад өсвөр насандаа вакцин хийлгэсэн эмэгтэйчүүд насанд хүрсэн хойноо умайн хүзүүний хорт хавдраар өвчлөх эрсдэл бага байгаа нь судалгаагаар тогтоогджээ.

Ланцет олон улсын сэтгүүлд нийтлэгдсэн тойм өгүүллэгт хүний папиллома вирусийн вакцинтай холбоотой нийт 1702 судалгааны өгүүллэгт дүн шинжилгээ хийж өндөр хөгжилтэй 14 орны 65 өгүүллэгийн дүн мэдээг ашигласан байна. Энэхүү судалгаанд хүний папиллома вирусийн халдвартай холбоотой 14, бэлгийн үүтэй холбоотой 29, хүний папиллома вирустэй холбоотой умайн хүзүүний CIN2 ангиллын дисплази эмгэг өөрчлөлттэй холбоотой 13 судалгааны өгүүллэгийг багтаасан байна. Судалгааны үр дүнд 13-19 насны охидод ХПВ 16, 18 дугаар хэв шинжийн халдварын тархалт вакцин хийснээс хойш 5-8 жилийн дараа 83 хувь, 20-24 насны эмэгтэйчүүдэд 66 хувь, ХПВ 31, 33, 45 дугаар хэв шинжийн халдварын тархалт 13-19 насанд 54 хувиар тус тус буурсан байна. Мөн бэлгийн үү 15-19 насны хөвгүүдэд 48 хувь, 20-24 насны залууст 32 хувиар тус тус буурсан үр дүнтэй байна.

Дархлаажуулалтын тухай хуулийн 10 дугаар зүйлийн 10.1 дэх хэсгийн "В хэв шинжийн хемофилюс инфлюэнза нянгийн халдвар" гэсний дараа "А вируст гепатит, пневмококк, хүний папиллома вирусийн халдвар" гэж хуульд нэмэлтээр орж байгаа А вируст гепатит, пневмококкийн эсрэг вакциныг Эрүүл Мэндийн Сайдын тушаалаар 2011 оноос улсын хэмжээнд тархвар судлалын заалтаар үе шаттай нэвтрүүлж эхэлсэн бөгөөд 2021 оны жилийн эцсийн байдлаар вакцины бүрэн тунгийн хамралт 93.7-95 хувьтай байна.

4.2 Хүлээн зөвшөөрөгдөх байдал шалгуур үзүүлэлтийн хүрээнд хийсэн үнэлгээ:

Энэ шалгуур үзүүлэлтийн хүрээнд хуулийн төслийн зохицуулалтыг хэрэглэх байгууллага хүлээн зөвшөөрч, хэрэгжүүлэх боломжтой эсэх тухай хуулийн төслийн зохицуулалтын нөлөөлөхүйц байдал, хэрэгжих боломжийг судалж, дүн шинжилгээ хийлээ.

Дархлаажуулалтын зөвлөх хорооны 2011 оны хурлаар А вируст гепатитын эсрэг вакциныг, 2016 оны хурлаар пневмококкийн эсрэг вакциныг товлонд нэвтрүүлэх нь зүйтэй гэсэн шийдвэрүүдийг гаргасан байна.

Дархлаажуулалтын зөвлөх хорооны 2019 оны хурлаар хүний папиллома вирусийн эсрэг вакциныг үе шаттайгаар нэвтрүүлэх төлөвлөгөө, зардлын тооцоог боловсруулан зардал-үр ашгийн судалгаанаас гарсан үр дүн, нотолгоонд үндэслэн папиллома вирусийн халдварын эсрэг вакциныг үе шаттайгаар нэвтрүүлэх бэлтгэл хангах, 2020 оноос эхлэн сайн дурын үндсэн дээр дархлаажуулж эхлэх зөвлөмжийг тус тус гаргасан байна.

Зүүн Өмнөд Азийн орнуудад 100 000 хүн амд умайн хүзүүний хорт хавдрын өвчлөлийн түвшин 10.9, нас баралтын түвшин 4.1 байгаа бол манай улсад өвчлөл 100 000 хүн амд 23.5, нас баралт 10.2 байгаа нь бүс дотроо өвчний дарамт хамгийн өндөр үзүүлэлттэй байна. Монгол Улсад умайн хүзүүний хорт хавдар эмэгтэйчүүдэд зонхилон тохиолдох хавдрын 2 дугаарт, нийт хорт хавдрын шинэ тохиолдлын 4 дүгээрт, нас баралтын 5 дугаарт эрэмбэлэгдэж байгаа тул хүний папиллома вирусийн халдварын эсрэг вакциныг хүлээн зөвшөөрөх шаардлагатай вакцины нэг юм.

4.3 Зардал

Зардлын тооцооны тайлангаас Дархлаажуулалтын тухай хуульд нэмэлт оруулах тухай хуулийн төслөөр 3 вакцин нэмэлтээр орж байгаа бөгөөд одоогийн байгаа зардлын хязгаарт багтаан үйл ажиллагаагаа оновчтой зохион байгуулах боломжтой. Тухайлбал: А вируст гепатитын эсрэг вакциныг 2011 оноос, пневмококкийн эсрэг вакциныг 2016 оноос эхлэн дархлаажуулалтын үндэсний

товлолд үе шаттай нэвтрүүлэн зардлыг улсын төсөвт тусган жил бүр дархлаажуулалтыг тасралтгүй зохион байгуулсаар ирсэн тул улсын төсөвт шинээр нэмэлт ачаалал үүсэхгүй. Хүний папиллома вирус (ХПВ)-ийн халдварын эсрэг вакцины нөлөөлөл ба зардал-үр дүнгийн шинжилгээг Дэлхийн Эрүүл Мэндийн Байгууллагын санхүүжилтээр Олон улсын PATH байгууллага, Анагаахын шинжлэх ухааны үндэсний их сургууль, Хавдар судлалын үндэсний төв, Халдварт өвчин судлалын үндэсний төв хамтран 2018 онд зохион байгуулсан. Вакцины зардлын-үр дүн, нөлөөллийг олон улсад тооцдог UNIVAC болон TRIVAC–н загварчлалын дагуу зардал-үр ашгийг 3 хувилбараар тооцон үр дүнг үнэлэхэд вакциныг нэвтрүүлсэнээр үр ашигтай гэсэн дүгнэлт гарсан байна. Хүний папиллома вирусийн халдварын эсрэг вакциныг заавал хийх дархлаажуулалтын үндэсний товллод 2023 оноос нэвтрүүлэхээр төлөвлөсөн бөгөөд зардлын тооцооллоор 70 000 гаруй хүүхдийг 1 тунгаар вакцинжуулахаар тооцоход нэг жилд ойролцоогоор 1.5 тэрбум төгрөгийг улсын төсөвт тусгах шаардлага бий болж байгаа бөгөөд 2023 оны Эрүүл мэндийн сайдын төсвийн багцад вакцин, биобэлдмэл, зүү тариурын төсөв 23 тэрбум төгрөг батлагдсан бөгөөд зардлын хязгаарт багтаан үйл ажиллагаагаа оновчтой зохион байгуулах боломжтой

Хуулийн төсөлд нэмэлтээр тусгагдсан дархлаажуулах арга хэмжээг хэрэгжүүлэхэд тогтолцоо, бүтэц, нэгжийг шинээр зохион байгуулах шаардлагагүй болно.

Иргэнд үүсэх зардал:

Дархлаажуулалтын тухай хуульд нэмэлт оруулах тухай хуулийн төсөлтэй холбоотойгоор иргэнд нэмэлт зардал үүсэхгүй.

Аж ахуйн нэгжид:

Хуулийн төсөл батлагдсанаар аж ахуйн нэгжид нэмэлт зардал үүсэхгүй

4.4. Хуулийн төслийн уялдаа холбоог шалгах

Хуулийн төслийн уялдаа холбоог шалгах хүрээнд дараахь асуултад хариулах замаар хуулийн төслийн уялдаа холбоог тогтоолоо:

	Шалгах асуултууд	
1	Төслийн зохицуулалт тухайн хуулийн зорилттой нийцэж байгаа эсэх?	Нийцэж байна.
2	Хуулийн төслийн хууль тогтоомж гэсэн хэсэгт заасан хуулиудын нэр тухайн харилцаанд хамаарах хууль мөн эсэх?	нийцэж байгаа
3	Хуулийн төсөлд тодорхойлсон нэр томьёо тухайн хуулийн төслийн болон бусад хуулийн нэр томьёотой нийцэж байгаа эсэх?	нийцэж байгаа
4	Хуулийн төслийн зүйл заалт тухайн хуулийн төсөл болон бусад хуулийн заалттай нийцэж байгаа эсэх?	Зөрчилдсөн зүйл заалт байхгүй.
5	Хуулийн төслийн зүйл, заалт тухайн хуулийн төслийн болон бусад хуулийн заалттай давхардсан эсэх?	Бусад хуулийн зүйл заалттай давхардсан зүйл байхгүй.
6	Хуулийн төслийг хэрэгжүүлэх этгээдийг тодорхой тусгасан эсэх?	Тийм

7	Хуулийн төсөлд шаардлагатай зохицуулалтыг орхигдуулсан эсэх?	Орхигдуулсан зохицуулалт байхгүй
8	Хуулийн төсөлд төрийн байгууллагын гүйцэтгэх чиг үүргийг давхардуулан тусгасан эсэх?	Чиг үүрэг давхардуулсан зүйл байхгүй
9	Төрийн байгууллагын чиг үүргийг төрийн бус байгууллага, мэргэжлийн холбоодоор гүйцэтгүүлэх боломжтой эсэх	Боломжгүй
10	Татварын хуулиас бусад хуулийн төсөлд албан татвар, төлбөр, хураамж тогтоосон эсэх	Байхгүй
11	Тухайн хуулийн төсөлд тусгасан тусгай зөвшөөрөлтэй холбоотой зохицуулалтыг аж ахуйн үйл ажиллагааны тусгай зөвшөөрлийн тухай хуульд тусгасан эсэх?	Тусгай зөвшөөрөлтэй холбоотой асуудал үүсэхгүй.
12	Монгол Улсын Үндсэн хууль болон Монгол Улсын олон улсын гэрээнд заасан хүний эрхийг хязгаарласан зохицуулалт тусгасан эсэх?	Хүний эрхийг хязгаарласан зохицуулалт агуулаагүй.
13	Хуулийн төслийн зүйл, заалт жендэрийн эрх тэгш байдлыг хангасан эсэх?	Байхгүй.
14	Хуулийн төсөлд шударга бус өрсөлдөөнийг бий болгоход чиглэсэн заалт тусгагдсан эсэх?	Байхгүй
15	Хуулийн төсөлд авлига, хүнд суртлыг бий болгоход чиглэсэн заалт тусгагдсан эсэх?	Байхгүй
16	Хуулийн төсөлд тусгасан хориглосон хэм хэмжээг зөрчсөн этгээдэд хүлээлгэх хариуцлагын талаар тодорхой тусгасан эсэх?	Байхгүй

Түүнчлэн энэхүү шалгах хэрэгслийн дагуу тогтоолын төслийг Хууль тогтоомжийн тухай хуулийн 29 дүгээр зүйлд заасан хууль тогтоомжийн төслийн эх бичвэрийн агуулгад тавих нийтлэг шаардлага, 30 дугаар зүйлд заасан хуулийн төслийн хэл зүй, найруулгад тавих нийтлэг шаардлагад нийцүүлэн боловсруулсан эсэхийг шалгахдаа Хууль тогтоомжийн тухай хуулийн дараахь заалтад заасан шаардлагыг хангасан эсэхэд хариулт өгөх замаар шалгалаа.

Хууль тогтоомжийн тухай хуулийн дараах заалтад заасан шаардлагыг хангасан эсэхэд хариулт өгөх замаар шалгалаа.

Хууль тогтоомжийн тухай хуулийн 29 дүгээр зүйлд заасан Хуулийн төсвийн эх бичвэрийн агуулгад тавих нийтлэг шаардлага	
Хууль тогтоомжийн тухай хуулийн зохицуулалт	Хуулийн төслийн зохицуулалтад үнэлгээ хийсэн байдал
29.1.1. Монгол Улсын Үндсэн хууль, Монгол Улсын олон улсын гэрээнд нийцсэн, бусад хууль, үндэсний аюулгүй байдлын үзэл баримтлалтай уялдсан байх	Хуулийн төсөл нь Монгол Улсын Үндсэн хууль, Монгол Улсын олон улсын гэрээнд нийцсэн, бусад хууль, үндэсний аюулгүй байдлын үзэл баримтлалтай уялдсан.
29.1.2. Тухайн хуулиар зохицуулах нийгмийн харилцаанд хамаарах асуудлыг бүрэн тусгасан байх	Тийм
29.1.3. Тухайн хуулиар зохицуулах нийгмийн харилцааны хүрээнээс хальсан асуудлыг тусгахгүй байх	Тухайн хуулиар зохицуулах нийгмийн харилцааны хүрээнээс хальсан асуудлыг тусгаагүй

29.1.4. Тухайн хуулиар зохицуулах нийгмийн харилцаанд үл хамаарах хуульд нэмэлт, өөрчлөлт оруулах буюу хүчингүй болсонд тооцох тухай заалт тусгахгүй байх	Тухайн хуулиар зохицуулах нийгмийн харилцаанд үл хамаарах хуульд нэмэлт, өөрчлөлт оруулах буюу хүчингүй болгох саналыг тусгаагүй.
29.1.5. Зүйл, хэсэг, заалт нь хоорондоо зөрчилгүй байх	Шаардлага хангасан
29.1.6. Хэм хэмжээ тогтоогоогүй, тунхагласан шинжтэй буюу нэг удаа хэрэгжүүлэх заалт тусгахгүй байх	Шаардлага хангасан
29.1.7. Бусад хуулийн заалтыг давхардуулан заахгүйгээр шаардлагатай бол түүнийг эш татах, энэ тохиолдолд эшлэлийг тодорхой хийж, хуулийн нэр болон хэвлэн нийтэлсэн албан ёсны эх сурвалжийг бүрэн гүйцэд заасан байх	Шаардлага хангасан
29.1.8. Тухайн хуулиар зохицуулах нийгмийн харилцаа, хуулийн үйлчлэх хүрээ, эрх зүйн харилцаанд оролцогч хүн, хуулийн этгээдийн эрх, үүрэг, зохицуулалтад удирдлага болгох, харгалзан үзэх нөхцөл байдал, нийтийн эрх зүйн этгээдийн чиг үүрэг, эрх хэмжээ, тэдгээрийг биелүүлэх журам	Шаардлага хангасан
29.1.9. Шаардлагатай тохиолдолд эрх зүйн хэм хэмжээг зөрчсөн этгээдэд хүлээлгэх хариуцлагын төрөл, хэмжээ, хуулийн хүчин төгөлдөр болох хугацаа, хууль буцаан хэрэглэх тухай заалт, хуулийг дагаж мөрдөх журмын зохицуулалт, бусад хуулийн зүйл, заалтыг хүчингүй тооцох, хасах заалт	Шаардлага хангасан
29.1.10. Шаардлагатай тохиолдолд бусад хуульд нэмэлт, өөрчлөлт оруулах болон хууль хүчингүй болсонд тооцох тухай дагалдах хуулийн төслийг боловсруулсан байх	Хуулийн төсөлтэй холбогдуулан бусад хуульд нэмэлт, өөрчлөлт оруулах шаардлага байхгүй болно.
29.1.11. Хуулийн төсөл нь хуулийн зорилго гэсэн зүйлтэй байж болох бөгөөд зорилгод тус хуулиар хангахаар зорьж байгаа иргэний үндсэн эрх, бэхжүүлэх үндсэн зарчим, хүрэх үр дүнг тусгана.	Шаардлага хангасан
Хууль тогтоомжийн тухай хуулийн 30 дугаар зүйлд заасан Хуулийн төслийн хэл зүй, найруулгад тавих нийтлэг шаардлага	
30.1.1. Монгол Улсын Үндсэн хууль, бусад хуульд хэрэглэсэн нэр томъёо хэрэглэх	Шаардлага хангасан
30.1.2. Нэг нэр томъёогоор өөр өөр ойлголтыг илэрхийлэхгүй байх	Нэг нэр томъёогоор өөр өөр ойлголтыг илэрхийлээгүй
30.1.3. Үг хэллэгийг монгол хэл бичгийн дүрэмд нийцүүлэн хоёрдмол утгагүй товч, тодорхой, ойлгоход хялбараар бичих	Шаардлага хангасан
30.1.4. Хүч оруулсан нэр томъёо хэрэглэхгүй байх	Шаардлага хангасан

Тав.Үр дүн, зөвлөмж

Дархлаажуулалтын тухай хуульд нэмэлт оруулах тухай хуулийн төслийн үр нөлөөг Засгийн газрын 2016 оны 59 дүгээр тогтоолоор батлагдсан “Хууль тогтоомжийн төслийн үр нөлөөг үнэлэх аргачлал”-ын дагуу тооцож дараах дүгнэлтийг гаргаж байна.

Дархлаажуулалтын тухай хуульд нэмэлт оруулах тухай хуулийн төсөл нь сонгосон шалгуур үзүүлэлтээр үнэлэхэд практикт хэрэгжих боломжтой, нэмэлт зардалын ачаалал үүсгэхгүй, хүлээн зөвшөөрөгдсөн, харилцан уялдаа холбоог хангасан үр өгөөжтэй байдлаар боловсруулагдсан байна.

Хуулийн төсөл нь Хууль тогтмолжийн тухай хуулийн 24 дүгээр зүйлийн 24.5.2 дэх заалтад заасны дагуу “хуульд нэмэлт оруулах тухай” хуулийн төслийн хэлбэрээр бичигдсэн байна.

---o0o---